

Payí Poro Epesasi ηweáyí nání eañinarini.

Payí rina Jisasoyá siyikí imónigá añí yoi Epesasiyo ηweagíáyí nání Poro eañinarini. Añí apí Esia piropenisíyo nikwíróniga uñí nípimíni seáyí e imónagápirini. Poro émáyí añímíni xwiyá yayí winipaxípi wái nura nemeríná añí apimi iwamíó eméíná Sabaríá ná woni e ηweañinigini (Wái wurimeiarigá 18:18-21). E nemo ámi wí e wí e neméisáná ámi ríwíyo e nání nuri niñweari uréwapiyaríná xwiogwí waú wo múroñinigini (Wái wurimeiarigá 19:1-41). E nemo ámi wí e emearíná omi íá nixero gwí añíyo ηwirárfé dání payí rina neari Tikikasomi wiowáñinigini.

1 ¹ Poroni —Nioni Gorixo Kiraisi Jisasoyá wái wurimeiaríñí wo imóníwíniginiri xegí diñí tñi nírípeañonirini. Nioni payí rina ámá Gorixoyá imónigá Epesasi ηweáyíne —Seyíne segí nawíni ikárinigíó, Jisasomi nuxídíróná píráníñí uxídarigíáyínerini. Seyíne nání nioni payí rina neari mónapariñini. ² “Negí ápo Gorixo tñi Áminá Jisasi Kiraiso tñi wá seawianiri seyíne níwayiróniro ηweapíri nání seaiiri éisixini.” nimónarini.

“Kiraiso tñi ikáriníηwaéne Gorixo nañí imóníñí apí apí neaiñirini.” uríñí nánirini.

³ Gorixo ámá diñí niyimiñí tígíáyí nimóniro añínami ηweáírixiniri niwimixiríná nañí wiariñípi, apí nípini Kiraiso tñi ikáriníηwaéne rixa neaiñí eñagi nání omi yayí uméwanigini. ⁴ O xwíarí sini mimixími dání nene oyá siñwíyo dání siyikwí míníηwaéne imónirane xwiyá mineamearipaxí imónirane yaníwá nání Kiraiso tñi nawíni ikáriníηwápimi dání íá yiyamiximí neaiñinigini. ⁵ O eñíná dání nene nání diñí sipí wiñí eñagi nání “Ámá nioni íá yiyamiximí wíáyí Kiraiso wiiniápimi dání gí niaíwí piaxí memíáyíniñí wimixíimigini.” yaiwiáriñinigini. Xegí diñíyo dání “E éimigini.” niwimóniri nání e yaiwiáriñinigini. ⁶ Nene re niyaiwirane seáyí e umeaníwá nání e niyaiwiáriri eñirini, “O wá nineawianiríná bi onímiápi mineawianí nene o xegí diñí sixí uyiño tñi nawíni ikáriníηwaéne eñagwi nání ‘Ayí

eni xixe níírixini.’ miwimóní xegí xewaxo anipá wírénapiñíríani?” niyaiwirane seáyi e umeaníwá náni e niyaiwiáriri enjírini. ⁷Nene Kiraiso tñi ikárininwaéne enagi náni o yoxáípami niperi xegí ragí púpimi dáni Gorixo gwíniñi nearoayírori xwiýá xíoyápi niwiaíkirane yariñwápi yokwarimí neaiiri enjírini. E nineairíná Gorixo wá onimiápi nineawianiri neaiñirani? ⁸Oweoi, aga wá ayá wí nineawianirinípimi dáni nearoayírori yokwarimí neaiiri enj enagi náni rariñini. O diñí émi saímí nimori amipí náni náni nijfá imóniño enagi náni ⁹xewaniño e éimiginiri wimóninípi tñi xixeni neríná enjíná dáni Kiraiso eniápipi dáni áamá náni e wiímiginiri enwipeárinípi —Api áamáya siñwíyo dáni ínimi imóninípirini. Api náni nene wía neaókímixiníri. ¹⁰⁻¹¹Enjíná dáni enwipeáriní api, ayí amipí náni anjínami tñi xwíárimí tñi imóniníyí “Kiraisomi simañwíyóniní ínimi wurínaníwá náni rimóninwini?” niyaiwiro xixeni e imóníírixiniri enwipeárinípirini. Síá e enwipeárinípi imóníwiniginiri rinárininíyí nimóniríná oyá diñí tñi xixeni e imóniníáriní. Pí pí o diñí neñwiperíná “E éimigini.” niwimóniri yaiwiárinípi siwiá mé api tñi xixeni yáraninípa enjíná dáni Kiraiso tñi ikárininwaéne náni “Áamá ayí nioniyá imóníírixini.” niwimóniri yaiwiáragípi tñi xixeni neri e neaimixiníri. ¹²Judayene —Áamá xámi Kiraisomi diñí niwikwímoro re yaiwigíáyí, “O neaiñipimi dáni Gorixo yeáyí neayimixemeaníáriní.” yaiwigíáyí náni nene xámi siñwí ipenwaénerini. Nene “Aga seáyi e imóniño, ayí Gorixoríani?” niyaiwirane seáyi e umeaníwá náni xíoyaéne neaimixiníri. ¹³Seyíné eni Kiraiso tñi ikárinigíáyíné enagi náni xwiýá nepaxiní imóniní yaní seaiapigíápi —Api Gorixo yeáyí seayimixemeaníá enagi náni yayí seainarinípirini. Api seyíné aríá niwiróná diñí wikwírófá enagi náni Gorixo xíoyá imóníírixiniri xegí kwíyí simimañíyo dániníñí “Niseaiapimíáriní.” rárinípi tñi ikiyiniñiní seaiáriníri. ¹⁴Kwíyí neaiapinípi tñi rixa ikiyiniñiní neaiárininagá náni diñí re moñwini, “Gorixo ‘Niseaiimíáriní.’ ráriní sini mineaímeañípi tñi xixeni nineaiiníáriní. Xíó ‘Nioni tñi niñwearo nioniyáyí imóníírixini.’ yaiwiarinípi tñi xixeni imónaníwá náni gwíniñi neaíkwamixiníáriní.” Diñí aniní e moñwini. Nene “Aga seáyi e imóniño, ayí Gorixoríani?” niyaiwirane seáyi e umeaníwá náni xegí kwíyípi tñi ikiyiniñiní neaiáriníri.

“Gorixomi seyíné náni rixiní seauriyariníáriní.” uriní nánirini.

¹⁵⁻¹⁶Gorixo api api e seainí enagi náni nioni eni áamá wí re rariñagía, “Epesasi ñweáyí Áminá Jisasomi diñí niwikwíroro áamá Gorixoyá imónigíá náni náni diñí sipí wariñoi.” rariñagía aríá wiñae dáni nioni seyíné náni Gorixomi yayí niwiayiríná wí pñi wiáraninámáni. Rixiní nuriríná seyíné náni diñí nimori ¹⁷rixiní re seauriyariníáriní, “Negí Áminá Jisasi Kiraisoyá Ñwíáoxini, seáyi e rimepaxí ápo Gorixoxini,

Epesasi n̄weáyo anani re wiírixini. Joxi dixí kwíyípmi dání ayí diñí émi saímí mopírí nání s̄kíkí womixiri dixí imóniñípi nání xixeni nijíá imónipíría nání wía wókímixiri éirixini.” seauriyariñárini. 18-19 Seyiné ripi ripi niyaiwiro nijíá xixeni imónipíría nání rixiñí seauriyariñárini, “Gorixo nioniyáyí nimóniro nioni t̄ni n̄weáírixiniri wéyo íá neaumiriní diñí ikwímoariniwápi, ayí apíríani?” yaiwiro “Xífoyaéne awiaxí imóniñí neaímeaníapi —Api ayá t̄ñí s̄mí s̄mí e mepaxí imóniñípirini. Api, ayí apíríani?” yaiwiro “Xífoyá ení sixí eániñí píri miwiaíkipaxí imóniñípi —Api aga seáyí émi imóniñípirini. Ámá xíomi diñí wikwíroarigiáyo diñí sixí wímoariniñípirini. Api, ayí apíríani?” yaiwiro epíría nání o segí diñí wía seaókímixinía nání omi rixiñí seauriyariñárini. Xífoyá ení sixí eániñí diñí wikwíron̄weáne sixí neaímoariniñí api pípi maríái, 20 ení sixí eániñí Kiraiso xwáripáyo dání owiápn̄imeaniri siñí wimixiri an̄nami xífoyá wé náúmini on̄weaniri wimixiri enípi, ayí xíomi diñí wikwíron̄weáne diñí sixí neamímoariniñí axípinirini. 21 Wé náúmini n̄weano, o giyí giyí seáyí e nimóniro wíniyo seáyí e umer̄weaarigiáyorani, giyí giyí n̄ení t̄ñwaéne nimóniri on̄weaaneyiniri yarigiáyorani, giyí giyí ení eániñí nimóniri omer̄weaaneyiniri yarigiáyorani, giyí giyí áminá nimóniri yarigiáyorani, pí pí yoí omiñí xixegíni yarigiáyíyá niwíriro rarigiáyorani, ayo niyoni kwíyí imónigiáyorani, ámá imónigiáyorani, niyoni o aga wiárí seáyí e wimóniñorini. Agwi rínáni maríái, ná ríwíyo ení aniñí e seáyí e niwimóniri n̄weaníárini. 22 Gorixo amipí n̄ni ámáraní, amipírani, Kiraisoyá suyíman̄wíyo wurínírixiniri wimixiniñí. O amipí niyoni nání Ámináo imóniño enagi nání ámá xífoyá siyikí imónigiáyo miñíyíniñí wimóninía nání ení wimixiniñí. 23 O miñíyíniñí imóniñáná ámá oyá siyikí imónigiáyí xegí waráriniñí imóniñoi. Miñíyí t̄ni warárí t̄ni nawíni enáná wará noni xixeni imónariñípa Kiraiso —O amipí n̄ni Gorixo wimónariñípi t̄ni xixeni imóníwiniginiri wimixariñorini. O Gorixo “Miñíyí xegípi on̄weaniri miwimóní wará ení t̄ñíyí imóníwinigini.” yaiwiniñípi t̄ni xixeni imóninía nání ámá oyá siyikí imónigiáyí api e imóniñoi.

**“Nanínaníwá nání imónagwi aí Gorixo siñí
neaimixiniñí.” uriniñí nánirini.**

2 1 Eníiná seyiné Gorixomi maní niwiaíkiro íwí yagiápimi dání naníniñíría nání imónagiáyínérini. 2 Sini e nimóniróná ámá Gorixomi mixídarigiáyí sipí yarigiápa axípi e yagiárini. Seyiné kwíyí sipíyí aní píriyo emeariniñíyo xiáwomi —O ámá Gorixomi maní wiaíkiarigiáyo sipípi éirixiniri diñí ukikayon̄orini. Oborini. Omi seyiné ení xídagíárini. 3 Ámá Gorixomi maní wiaíkiarigiáyí yarigiápa nene ení axípi nerane pí pí nişikwini mimóniñípi oyaneyiniri miñí n̄ineainiríná sa anani yagwáriní. Pí pí íeapá neainípirani, negí diñíyo dání oyaneyiniri

neaimóníípirani, sa anani yagwárini. Ámá Gorixo wikí niwóniri pirí umamóaná nanínipíríáyí níni yarigíápa nene eni negí néra wagwápimi dáni neríná axípi nanínaníwániri yagwárini. ⁴Nene e imónaniri yagwá aiwi Gorixo nene náni diñí sipí niwiríná xwapí ayá wí wiarigagi náni “Wá onimiápi wianímigini.” miwimóní ayá wí neawianíñirini. ⁵Nene rixa nañí imóniñáná wá neawianíñimani. Nene sini oyá mañí niwiaíkirane íwí yagwápimi dáni nanínaníwá náni imóniñáná wá nineawianiri Kiraiso ámi owiápínimeaniri siñí niwimixiríná nene eni nawíni siñí neaimixiríñirini. Gorixo wá niseawianiriñípimi dáni yeáyí seayimixemeañirini. ⁶Nene Kiraisi Jisaso tñni nawíni siñiñiñí nineaimixiri neawáriñimani. O tñni nawíni ikárininwaéne eñagi náni o xwáripáyo dáni owiápínimeaniri niwimixiríná nene o tñni nawíni wiápínimeáírixiniri neaimixiri añínami gí íwo wé náúmini onweaniri niwimixiríná o tñni nawíni ñweáírixiniri neaimixiri eñirini. ⁷Ayí ripi náni e eñirini. Ámá níni agwi ríná ñweagiáyífrani, ná ríwíyo ñweapíríáyífrani, níni Gorixo ámá náni diñí sipí niwiri Kiraisi Jisaso uowárenapiñípi náni diñí nimoróná diñí re yaiwíírixiniri náni e eñirini, “O diñí wikwírogíáyo wá onimiápi niwianiri uowárenapiñimani. Wá ámá wianarigíápi tñni xixeni mé seáyi e imóniñípimi aí wíarí nimúrori imóniñípi niwianiri uowárenapiñirini.” yaiwíírixiniri náni Gorixo e eñirini. ⁸⁻⁹Seyíné Jisasomi diñí wikwíróaná Gorixo wá niseawianiri seaiñípimi dáni yeáyí seayimixemeañirini. Segí diñí tñni egíápimi dáni yeáyí seayimixemeañimani. Seyíné nañí yariñagía siñwí niseaniri náni yeáyí seayimixemeañimani. Ámá wí aí wigí egíápi náni weyí mímearinipa éírixiniri anipá yeáyí seayimixemeañirini. ¹⁰Ayí ripi nánirini. Agwi nene imóniñwápi Gorixo neaimixiñenerini. Kiraisi Jisaso tñni ikárininwaéne neaimixiñí eñagi náni “Imiriñí mimóniñípiñi éírixini.” yaiwiñípi —Api eñíná dáni repeáriñípirini. Apimi xidíírixiniri neaimixiñenerini.

**“Kiraiso Judayene tñni émáyíné tñni nawíni
neakumixáriñirini.” uríñí nánirini.**

¹¹Ayináni eñíná seyíné segí sénáíwa seaxirigíe dáni éma imónigíáyíné —Seyíné náni Judayí re seararigíáyínérini, “Íyí símí sío miwákwínigíáyíñirini.” seararigíáyínérini. E niriro aí “Íyí símí sío wákwínariñwaénerini.” rinarigíáyí yarigíápi, ayí Gorixoyá wé tñni maríái, ámá wé tñnini wákwínarigíápirini. Seyíné eñíná imónagiápi náni sini diñí oseainini. ¹²Íná Kiraiso tñni mikumixiní xegí bi nimóniro ná jíamíñiñí ñweaagáñirini. Gwí Isireriyíyá imónigíárí —Arí Gorixo nioniyárí oimóniri íá yamixiñíñirini. Arí tñni seyíné wigíyí wí imónagiámani. Xwiyíá gwí arími símímaní e dáni “E niseaiimíárini.” réroáriñípi seyíné eni niseakumixiri misearagíyínérini. Seyíné ámá Gorixomi mixídarigíáyí tñni

nikumixiniróná ríwéná naní apí neaímeaníáríaniri diñí níkwímoro xwayí naniri ñweaagiámáni. Gorixo náni bí ñíjíá imónagiámáni. ¹³Eñíná seyíné e nimóniro Gorixo tíámíni ná jíamíniñí ñweaagiá aiwi agwi ríná Kiraisi Jisaso tíni nawíni ikárinigíá eñagi náni o niseapeiríná xegí ragí púípimi dáni nipemeámi Gorixo tíñímíni añwi éniñí seabiñírini. ¹⁴Émáýíné Judayí tíni sini símí tíni minípa epíría náni piyíá neawíriniñí. E neríná émáýíné Judayí tíni símí tíni inagiápi, apí xwínániñí niseamudímori píronjipi xío pépimi dáni xwíná nípineamoríniñí nerí áamá apiaú siyikí ná bini imónipisi náni imixiniñí. ¹⁵Xwínániñí niseamudímori píronjipi —Apí ñwí ikaxí eániñíyo “E érixini. E érixini.” niriri sekaxí nira uñipi tíni “E mepani. E mepani.” niriri ñwí ikaxí nira uñipi tíni ayo eániñípirini. Apí rixa siwiá imixiniñí. Ayí émáýíné tíni Judayí tíni áamá apiaú nioni tíni níkariniñíipimi dáni siyikí ámi siñí ná bini oimóniri ñwí ikaxí eániñípi siwiá imixiniñí. E neríná áamá apiaúmi piyíá wíriniñí. ¹⁶Yoxáípami peñipimi dáni áamá apiaú símí tíni inagiápi xwapíría eaáririri siyikí ná bini oimóniri níkwimiximáná Gorixo tíámíni nipemeámi uri emíániri ñwí ikaxí eániñípi ná mayí siwiá imixiniñí. ¹⁷O ñíbiri émáýíné, Gorixo tíñí ná jíamíniñí ñweagiáyíné tíni Judayí, o tíñí añwi éniñí ñweagiáyo tíni wáí re seariniñí, “Niyínéni tíni nawíni imónipíri náni rixa piyíá seawíriniñí.” seariniñí. ¹⁸O, negí wo imóniño ápo Gorixo tíámíni ñweañagi náni Judayene tíni émáýíné tíni anani xegí kwíyí neaiapiniñí dáni anani o tíñímíni upaxí imóniñwini. ¹⁹Ayínáni seyíné sini wí eñíyíné mimóniñoi. Sini xerwíyíné mimóniñoi. Oweoi, rixa áamá Gorixoyá imónigíáyí tíni kumixiniñoi. Rixa Gorixoyá íwíaxé wiyínéniñí imóniñoi. ²⁰Ayí ripi seariniñí. Gorixo añí wiwá nímiriríná wáí wurimeiarigíáwa tíni wíá rókiamoarigíáwa tíni nítiwayirómáná émáýíné eni seáyi e niseaikwiárimáná nimira peyariñíniñí imónini. Añí iwá náni síñá xámi nítiwayirori tiniño, ayí Kiraisi Jisaroni. ²¹Añí niwáni o eñípimi dáni píraníniñí níkwíróniñga uri xwé nimóga uri yariñagi náni añí ñwíá Ámináo náni wiwá imónarini. ²²Émáýíné eni Kiraiso tíni ikárinigíáyíné eñagi náni o añí Gorixo xegí kwíyíipimi dáni ñweanía náni iwá nimira nípeyiríná xíoyá siyikí imónigíá wíniyí tíni niseakumixiri nimira peyarini.

**“Gorixo yumí eñwípeáragípi wíá wókímixíwiniginiri
nirípeañíri.” urini nánirini.**

3 ¹Gorixo émáýíné tíni Judayene tíni nawíni neakumixiniñí eñagi náni Poroni —Nioni Kiraisi Jisaso náni émáýíné wáí searimeariñagi náni gwí ñiñwirárigónirini. ²Ai “Gorixo nioni wá níniwianiri émáýíné wáí searimía náni níripeañípi náni seyíné rixa aría ría wíawixini?” nímonarini. ³Xwíyíá nene yumí neaimóniñípi Gorixo wíá nókímixíagi náni apí náni ñíjíá imóniñini. Apí náni rixa bí onimiápi ríwamiñí neari

searfini. ⁴Seyiné api íá niroróná re yaiwipaxírini, “Gorixo enjíná dáni e éimiginiri yumí yaiwiáriri Kiraiso agwi ríná neaimixiri enjipi náni nijjá Poro imóninjipi, ayí apiríani?” yaiwipaxírini. ⁵Ámá enjíná dáni neweáa bagíáyí api náni xe nijjá oimónípoyiniri wía wókímixinjímani. E mepa neri aí agwi ríná kwíyípimi dáni xegí wái wurimeiarigíawami tñi wía rókiamoarigíawami tñi yumí enjwípeáragí api náni anani wía wókímixariní. ⁶Yumí Gorixo enjwípeáragí wía neaókimixíípi, ayí ripirini. Émáýiné xwiýá yayí neainarinjípimi dijí níkwíroróná Kiraisi Jisaso tñi nawíni ikárinigíáyiné imónigíápimi dáni seyiné Judayí tñi nawíni Gorixo ipimoárinjipi meapaxí imóniro ayí tñi níkwímixinimáná siyikí ná bini imóniro Gorixo “E niseaimíárini.” símimanjýo dáni réroárinjipi ayí tñi nawíni seámeapaxí imóniro egíáyínérini. Yumí Gorixo enjwípeáragí wía neaókimixíípi, ayí apirini. ⁷Gorixo xwiýá api wái nurimeíwiniginiri ninirípearíná “Ominjínjé e niinía náni wá niwianiri anipá e owiimíni.” yaiwinjipi tñi xixeni niiri “Enjí sixí owímiximíni.” yaiwinjipi tñi xixeni niiri neri nirípeanjírini. ⁸Ámá Gorixoyá imónigíáyo onaxíyikwini imóninjáoni, ayí nioni imóninjá aiwi o émáyo awiaxí xegí bi imóninjé Kiraiso neainjipi —Api aga seáyi émi imóninjé enjagi náni ámá wigí dijíyo dáni wí “Ayí apiríani?” yaiwipaxí mimóninjípírini. Api náni wái uríwiniginiri Gorixo wá api e niníwianiri nirípeanjírini. ⁹Ámá Gorixo ayo e wíimiginiri yumí yaiwiáragípi náni re yaiwipíría náni, “Gorixo neríná xío yaiwiáragípi tñi xixeni enjírani?” yaiwipíría náni wía wókímixíwiniginiri eni nirípeanjírini. Xámi Gorixo —O amipí nñi imixinjorini. O ínimi ripi yaiwiáragípi náni, “Ámáyo yeáyí uyimixemeámía náni api éimigini.” yaiwiáragípi náni “Ámá xe anani nijjá oimónípoyi.” miyaiwí yumí niwia wagírini. ¹⁰Agwi ríná anjína tñjímíni néní tígíáyí tñi áminá imónigíáyí tñi Gorixo ámá xixegíni imónigíáyí níkwímiximáná siyikí ná bini wimixarinjagi síjwí niwiniróná “Nijjá xixegíni Gorixo imóninjipi sixí ínijnáná níkwioámiga eaarinjipi yapí ría imónini?” yaiwipíría náni enjíná dáni ámáyo yumí niwia wagírini. ¹¹Api e neríná xío enjíná dáni “E éimigini.” yaiwiáragípi —Api negí Áminá Kiraisi Jisaso neainjípimi dáni xixeni yárinjípírini. Api tñi xixeni enjiginini. ¹²Kiraiso tñi níkárinirane náni ayá igigí mé epaxírini. “Gorixomi rixinjé bi ouraneyi.” nineaimóniríná omi dijí níkwírororinjípimi dáni “Anani aría neainjioi.” niyaiwirane o tñáminíninjé nurane rixinjé uripaxí imóninjwini. ¹³Ayináni nioni re osearimíni, “Nioni seyiné arírá seaiminiri yarinjápi náni xeaninjé ripi nímeáípi náni Gorixomi nuriróná anigwi manjé ríninjé meáarinaniginiri kikiá mepani.” osearimíni. Nioni nímeáípi, ayí apimi dáni seyiné seáyi e imónipíría náni nímeaarinjagi náni seararinjini.

“Gorixo enjí sixí seáimixíwiniginiri seauriyarinjírini.” urinjé nánirini.

¹⁴⁻¹⁵Ayináni nioni ápo Gorixomi —O gwí arí arí anjínami njweagíáyorani, xwíárími njweagíáyorani, ayo niyoni emeanjorini. Omi rixinjé urimíniri

náni xómiñí niyikwiri re urariñáriní, ¹⁶ “Joxi Epesasi ηweáyo joxiyá kwíyípmi dání ení sixí weámixei. E neríná joxi pírániñí rixídi píria nání seáyi e xewaniñoxi níkiniri imóniñipi tñi wigí diñí ení sixí weámixei.” urariñáriní. ¹⁷ Ámá aní wiwámi nípáwiríná yariñípa Kiraiso segí diñí wikwíroarigíápmi dání níwapiiri oseañweaniri rixiñí “Ení sixí weámixei.” seauriariñáriní. Íkíá xwíáyo pípiñí niwárirí xaíwí roariñípa seyíné eni axípi e nero Gorixo wá seawianíñipimi pípiñíniñí niwáriro xaíwí rórixiniri seauriariñáriní. ¹⁸⁻¹⁹ Seyíné e nimónirónáyí, ámá Gorixoyá segí wíniyí nání tñi Kiraiso nene nání diñí sipí wiaríñipi — Diñí sipí o wiaríñipi ámaéne negí wíyo wiaríñwápi tñi xixeni mimónini. Api aga seáyi e ná émi imóniñipirini. Api nání ámá níjía nimóniro aí “Yopari e iyí rimónini?” niriri níjía xixeni mimónipaxípirini. Api nání seyíné diñí nimoro “Ayí api ipi rimónini?” yaiwipíríáriní. E nerónáyí Gorixo nimóniri yariñipi nípmi nání diñí sixí seaímopaxíriní. ²⁰⁻²¹ Gorixomi — O nene rixiñí nuriranéná “E neaiii.” urirane “E epaxoríani?” yaiwirane yariñwápmi neaiipaxomani. Xíoyá ení sixí eániñipi rixa neamímoñíyo dání aga seáyi émi wiárfí múropaxí imóniñipi neaiipaxorini. Omi Kiraisi Jisasoyá siyikí imóniñwaéne, o tñi nawíni ikáriníñwaéne íníná aniñí miní yayí numéra úwanigini. Ámá ríná dání gíni gíná ηweañwaéne yayí numéra waníwá nání imónáríwiniñí. “E éwanigini.” nimónariní.

“Kiraisoyá siyikí imóniñwaéne oyá warárfí imóniñwini.” uríñí nánirini.

4 ¹ Ayináni Ámináo nání wáfi rimeariñápmi dání gwí niñwirárigíoni ení rirémixí bí ripi oseaimini. Ámá wí seyíné emeariñagía siñwí niseaniróná diñí re seaiaiwipíría nání, “Gorixo ayí nañí e imónírixiniri wéyo íá umiriñipi tñi xixeni ayo ría yariñoi?” seaiaiwipíría nání íá seaumiriñipi nání diñí nimoro pírániñí érixini. ² Yunigíáyíné imónírixini. Ámáyo awayini mérixini. Ámá wí uyínií niseaikárirínáyí aí xe oneaikáripoyiniri siñwí winírixini. Ayí nání diñí sipí niseairiñipimi dání ikwiañwí weapínírixini. ³ Kwíyí Gorixoyápi seyíné nawíni ikárinipíri seakumixiñí enagi nání píyíá seawíriñíyíné gwiaumí niniriñipimi dání aniñí apini e imóníwanigíniro xaíwí íá xirírixini. ⁴ Ayí ripi nání searariñini. Wará Jisasoyá siyikí imóniñwaéne imóniñwárfí ná wiríni imóniñwini. Kwíyí nineneni neaiméañipi eni ná bini imónini. Gorixo nioniyá oimónipoyiniri wéyo íá nineaumiriríná “Xío neaiiníápi, ayí apíríani?” yaiwiani nání neaimixiñipi bí bí mimóní axípmi imóniñagi nání diñí “E neaiiníáriní.” niyaiwirane wikwímoariñwápi eni ná bini imónini. ⁵ Negí Ámináo eni ná wonirini. Diñí wikwíroariñwápi eni ná binirini. Wayí Kiraisomi diñí níwikwírómáná meariñwápi eni ná bini imónini. ⁶ Gorixo — O ámá nání emeañorini. Omi nání simañwíyóniñí wuríniñíorini. Niyoni xío wimónariñipimi dání wimixariñorini. Niyoni diñí ukikayañorini. O eni ná wonirini.

7 Apí nípini ná bini ná bini nimóga uŋagi aiwi o Jisasoyá siyikí imóniŋwaéne wá nineawianiri ayí e epaxí e epaxí imóníŋrixiniri sixí neamímoŋŋipi xixegíni sixí neamímoŋŋirini. E neríná sipíí mineaí Kiraiso wá nineawianiri neaiiŋŋipi tŋni xixeni neamímoŋŋirini. 8 Ayináni Bikwíyo dáni Kiraiso náni re niriniri eánini, “O émi náni nipeyiríná pikiorápŋíyí aga ayá wí niméra yiri ámáyo wá niwianiri anipá bi mini wiri eŋŋirini.” Bikwíyo dáni e niriniri eanini. 9 Xwiyíá “O émi náni nipeyiríná” riniŋŋipi pí náni rinini? Ayí o sini aŋŋinami náni mipeyipa neríná xámi xwíárími íniríwámíni piyíŋŋi siwí aŋŋimíni wepíniŋo eŋagi náni rinini. 10 Wepíniŋo, ayí peyiŋo axorini. Nipeyiríná amipí náni Gorixo “E imóníwiniŋini.” yaiwíáríŋŋipi xixeni imóniníá náni oeminiri aŋŋi piríyo wíárí seáyi riwámíni peyiŋiniŋini. 11 Xwiyíá nioni miŋŋi iróá ripi, “Ámáyo wá niwianiri anipá bi mini wiri eŋŋirini.” miŋŋi iróá api, ayí ripi nánirini. Kiraiso áamá wíyo wáí nurimefrixiniri wimixiŋŋirini. Wíyo wáí nirókiamoíŋrixiniri wimixiŋŋirini. Wíyo sini Gorixomi mixídarigiáyo áwanŋi nuriróná óŋniŋŋi imopíría náni misí imóníŋrixiniri wimixiŋŋirini. Wíyo rixa Gorixomi xídarigiáyo umeŋwearo uréwapiyiro éfrixiniri pasitá wimixiŋŋirini. 12 Gorixoyá imóniŋwá nineneni xixe arirá inipaxí imónaníwá náni woneni woneni api api e nineaimixa uŋŋirini. Kiraisoyá wará nene iníwárái sayá nimóga uníá náni xixe arirá inipaxí imónaníwá náni api api e nineaimixa uŋŋirini. 13 Nene Gorixo api api e nineaimixa uŋŋipimi dáni xewaxomi diŋŋi axípi wikwírorane o náni xixeni niŋŋá imónirane neranéná bini bine maríái, axeneni imónaníwáráni. Yóí Kiraiso imóniŋŋipi nene eni api tŋni xixeni imónaníwá náni api api e nineaimixa uŋŋirini. 14 Gorixo api api e nineaiaa uŋŋi eŋagi náni agwi nene sini píopia yapi imónipaxí mimóniŋwini. Ewé imeamíkwí neríná mamówáririri míeyoari néra waríŋŋipa, imiŋŋi neríná nixemi uri nixemi biri néra waríŋŋipa nene eni axípi sini e epaxí mimóniŋwini. Xwiyíá nepa mimóniŋŋi xegí bi xegí bi nearéwapiyaniro yarigiápimi dáni sini nixemi neauri nixemi neabiri epaxí mimóniŋwini. Ayí ripi searariŋŋini. Ámá nepaxiŋŋi nimóniro wigí ináyíniŋŋi nimóniriŋŋipimi dáni yapi nearéwapiyaniro éíáyo sini aríá yímiŋŋi wipaxí mimóniŋwini. 15 E mimónipa nerane xixe wá niwianeniranéná xwiyíá nepa rarigiápini íá xiríwanigini. Api nixiriranénáyí, nene pí pí neríná yóí imóniŋwaéne nimóga nurane Kiraiso tŋni píraníŋŋi kumixinaníwáráni. O warárái imóniŋwaéne náni miŋŋiŋŋi imónini. 16 O miŋŋiŋŋiŋŋi imóniŋáná oyá siyikí imóniŋwaéne xío neaimixariŋŋipimi dáni wé sikwí úpikwí saŋwí ayí niwíkwíróniŋŋi imóniŋŋipániŋŋi imóniŋwini. Api nípini e imóníwiniŋŋiniri imóniŋŋipi tŋni xixeni neríŋŋiŋŋi dáni ikwíróniŋŋi. Api api e imóníwiniŋŋiniri imóniŋŋipi tŋni xixeni nero diŋŋi sipí ninirínáyí, wará niríni xwé niwiaróá uri eŋŋi sixí íniri néra uníárini.

“Xámi yagiápi yará nípimoro siŋŋi bi ŋwiráriníŋŋirini.” uríŋŋi nánirini.

17 Ayináni nioni Ámináo tŋni ikáriníŋŋiŋŋi íkwairiri bi oseaimini. Ámá Gorixo náni majíá imóniŋíáyí yarigiápa sini mepa éfrixini. Ámá

ayí amipí surímá imóniņipi nánini diņi moarigiáyí eņagi náni rariņini. ¹⁸Sipípi náni diņi nimoro náni wigi diņi síá yimixinarigiárini. Majiá ikáriniro diņi wakisi iniro yarigiá eņagi náni diņi niyimiņi Gorixo áamá xíomi diņi wikwíroarigiáyo sixi uyariniņi tígíáyí mimóniņoi. ¹⁹Wigi diņi siņániņi imóniņagi náni ayá bi yarigiámani. “Íwí inaniwá náni ría imóniņwini?” niyaiwiro sími xeadípénarigiárini. Pí pí piaxi weáni paxi imóniņipi aí sini mé wiári yarigiárini. ²⁰Ayí e yariņagiá aiwi seyíne Kiraiso náni nisearéwapiyiriná wí e searéwapiyigiámani. ²¹Nioni re nimónarini, “Seyíne Kiraiso náni rixa aríá wigiárini. Ámá Jisaso tni ikárinigiáyí epaxi imóniņipi rixa searéwapiyigiárini.” nimónarini. Ámá Jisasomi xidarigiáyini nepaxiņi imóniņipi náni niĵiá imónigiá eņagi náni rariņini. ²²E érixiniri rixa searéwapiyigiápi, ayí ripirini. Seyíne sini Jisasomi diņi miwikwíropa neríná sipi imónagiápi — Api seyíne sipi nera wagiápi dáni siņáni imóniņipirini. Íwí náni miņi inarigiápimi dáni xwiríá seaikixéminiri náni yapí seaíwapiyiminiri eņipirini. Api yarániņi pí mórrixini. ²³Ámi bi seyíne rixa searéwapiyigiápi, ayí ripirini. Segi diņi moarigiápi ámi siņi bi yárió inírixini. ²⁴Ámi bi searéwapiyigiápi ripirini. Seyíne ámi ámá siņi oimóniņoyiniri Gorixo seaimixiyípi — Api Gorixo xewaniņo imóniņipa imóniņipirini. E nimóniróná nepaxiņi nimóniriņipimi dáni wé róniņi ero Gorixo wimónariņipi ero epaxipirini. Api seyíne ŋwirárinírixini.

Eņi rirémixi bi wiņi nánirini.

²⁵Ayináni segi yapí rariĵiápi emi nimómáná woxini woxini ámá seaimeaarigiá ĵiyi ĵiyo xwiyíá nuriríná nepaxiņipini urírixini. Nene Kiraisoyá wará axírimi dániniņi ninirane xixe ikwikwírí iniņwaéne eņagi náni rariņini. ²⁶Seyíne wiki niseaóniri aiwi wiki seaóniņipimi dáni “Xe sipi oemini.” niyaiwiri e mepa érixini. Wiki xwapí ayá wí nóga mupa érixini. Sini niseaónirínáyí, sogwí ipímeái e dáni píni wiá rírixini. ²⁷E nero obo ayí íwí érixiniri xe yapí oneaíwapiyiniri siņwí miwinipa érixini. ²⁸Íwí meaarigiáyí ámi íwí bi mimeapa érixini. E mepa nero ríwí niríkwínimáná wigi wé tni omiņi xixeni imóniņipi nero ámá amipí náni díwí ikeamónarigiáyo arirá wíwaniginiri érixini. ²⁹Segi maņiyo dáni sipi xwiyíá bi aí miripa érixini. Ámá pí pí xwiyíá uripaxi imónigiáyo wigi imónigiápi tni xixeni nuriríná diņi sixi inipaxi imóniņipini urírixini. Gíni gíná nuriróná naņi owimixaneyiniro náni diņi wiá wónipaxi imóniņipini urírixini. ³⁰Seyíne sipi neriņipimi dáni kwíyí Gorixoyápi diņi ría uxepaxi imóniņipi wí mepa érixini. Kwíyipi, ayí síá yopariyi Gorixo gwániņi seaíkweanía náni rixa ikiyiņiņi seaiáriņipi eņagi náni searariņini. ³¹Diņi wí síá miyikínipa érixini. Mixi wí ripaxi mimónipa érixini. Wiki ría ápiáwiniņi mónipa érixini. Xwamiáni wí mepa érixini. Xwiyíapai wí muņwiráripa érixini. Sími tni wí miwipa érixini. ³²Api

api mepa nero xixe diŋí sipí iniro wá wianeniro érixini. E neróná Gorixo Kiraiso seaiŋípimi dáni segí wikárigíápi yokwarimí seaiŋípa seyiné eni xixe yokwarimí infrixini.

5 ¹Seyiné niaíwí Gorixo diŋí sixí seayiŋíyíne eŋagi náni omi ikaniŋí wiaxídfrixini. ²Kiraiso —O ámaéne naŋí neaimiximiniri náni yoxáipámi xe onipikípoyiniri neríná Gorixomi piyíá wíriamiginiri ridiyowániŋí niniri omi sinadiŋí naŋí weaŋorini. O nene náni diŋí sipí niwiríná neaiŋípa nene eni pí pí neranéná “Ámáyo diŋí sipí niwirinípimi dáni ría yariŋwini?” niyaiwinirane naŋíni wiíwanigini.

³Seyiné ámá Gorixoyá imónigíáyíne eŋagi náni ámá wí seyiné náni ripi ripi ripaxí oimónípoyiniri siŋwí miwinipa érixini, “Ayí íwí api inigíawixini. Piaxí weáŋipaxí api egíawixini. Amipí wí mineamúropa oeniri aniŋí miní yariŋoi.” Api api ripaxí oimónípoyiniri siŋwí miwinipa érixini. Seyiné api api wí mepa érixiniri seariŋini. ⁴Seyiné riperiŋí niriróná xwiraimimí iniŋí bi miripa érixini. Sipí ikaxírani, xwiyíá miponiŋírani, bi miripa érixini. E mepa nero Gorixomi xfo seaiŋípimi náni yayí wírixini. ⁵Seyiné ripi náni rixa niŋá imóniŋagía náni rariŋini. Ámá íwí inarigíáyírani, wigí xwioxíyo piaxí eámixinarigíáyírani, ámá amipí wí mineamúropa oeniri aniŋí miní yarigíáyí —Ayí amipí mineamúropa oeniri yarigíápi wigí ŋwíániŋí nimixiro mearigíáyírani. Ámá ayírani, ayí náníyí wo aí Kiraiso tñi Gorixo tñi awaúyá xwioxíyo wí niŋweaníamani.

“Gorixoyá wía ókiŋípimi néra eméwanigini.” uriŋí nánirini.

⁶Seyiné sipí api api oépyiniri yapi searepisipírixiniri awíniŋí ŋweárixini. Ámá Gorixomi naŋí wiaŋkíarigíáyí api api yarigíáyí eŋagi náni o xegí wikí wóniŋípi píri umamonía eŋagi náni seariŋini. ⁷Ayináni seyiné ayí tñi nikumixiniro mepí mitinipa érixini. ⁸Eŋíná seyiné sipí api api néra nuróná síá yiniŋímiŋí emeagíáyíne imónagía aí agwi ríná Ámináo tñi nikáriniriŋípimi dáni wía ómixiniŋe emearigíáyíne imóniŋagía náni seariŋini. Ayináni wía ómixiniŋe yarigía wiýinéniŋí nimóniro érixini. ⁹Ámá wía ómixiniŋe emearigíápimi dáni pí pí naŋí imóniŋípirani, pí pí wé róniŋí imóniŋípirani, pí pí nepa imóniŋípirani, niŋini yarigía eŋagi náni rariŋini. ¹⁰Api api nerónáyí, Ámináo wimónariŋípi náni éwapínírixini. ¹¹Ámá síá yiniŋímini emearigíáyí tñi nikumixiniro sipí ayí yarigíápi —Apimi dáni ámáyo naŋí wí wiipaxí menini. Apimi dáni ámá xwiríáni ikixénipaxípi imónini. Api mepa érixini. E mepa nero ámá nini “Síá yiniŋímini emearigíáyí yarigíápi sipí ría imónini?” oyaiwípoyiniri uyíwí wíániŋí wómixiríini. ¹²Íwí wigí yumí yarigíápi nerínáni maríái, sa api náni niriríná aí ayá neainipaxí eŋagi náni xwiyíá ripi niriri eáápimi neámiméini. ¹³E neri aí amipí ámá yarigíáyo wía wómixáná “Api naŋí ría imónini? Sipí ría imónini?” yaiwipaxírani. Wía wómixáná amipí siŋáni nimóniriŋípimi

dáni wía ónariņi eņagi náni rariņini. ¹⁴ Ayináni áamá sipí yarigiáyo xwiyiá ripi Bikwíyo dáni urinini, “Sá weņi roxini, rixa rikewónei. Áamá piyi wegíe dáni rixa wiápínimeai. E éáná Kiraiso wía rómixiniņoi.” urinini.

¹⁵ Ayináni seyíne nemeróná siņwí tni nemero majiá nikáriniri yarigiáyí yapi mé diņi émi saími moarigiáyí yapi érixini. ¹⁶ Ríná áamá sipí xwapí ayá wí yarigiána eņagi náni seyíne sini naņi imóniņipi epaxína imóniņánáyí, e érixini. ¹⁷ Ayináni agwi seyíne xaxá mikárinipa nero Ámináo “E érixini.” wimónariņipi náni niđiá oimónaneyiniro érixini. ¹⁸ Iniigi papikí yarigiápi xwapí niniro papikí mepa érixini. Xwiríá seaikixepaxí eņagi náni searariņini. Gorixo wimónariņipi yaníwá náni xíoyá kwíyipi xe neaxixerówiniginiri érixini. ¹⁹ Seyíne xwiyiá niriniróná soņi Gorixo neaiiņipi náni riniņipi tni seañi Kiraiso nánipi tni soņi oyá kwíyí nánipi tni niriro rinírixini. Ámináomi yayí numeróná maņi tni soņi niriro ađ diņi tni eni rírixini. ²⁰ Pí pí seyíne seaimeeariņipi nipini náni ápo Gorixomi yayí wírixini. “Negí Áminá Jisasi Kiraiso tni ikárinigađwi náni yayí wipaxíríani? Oyi, e epaxírini.” niyaiwiro e érixini. ²¹ Nene aríá niwirane wáyí wiņwáo Kiraiso eņagi náni simaņwíyóniņi xixe yeáyí uríniníwanigini.

Wigi xiepiwami uriņipi nánirini.

²² Xiepiwayíne, Áminá Jisasomi simaņwíyóniņi yeáyí wurínarigiápa segí oxowami eni simaņwíyóniņi yeáyí wurínírixini. ²³ Kiraiso áamá xíoyá siyikí imónigiáyo —Ayo gwíniņi roayíroņi eņagi náni xíoyá waráriníni imóniņoi. Ayo Kiraiso miņiyíniņi wimóniņipa oxowa wigi apixíwayá miņiyíniņi imóniņagi náni rariņini. ²⁴ Kiraisoyá siyikí imónigiáyí xíomi simaņwíyóniņi wurínarigiápa apixíwayíne eni segí oxowa pí pí náni searána aríá niwiro simaņwíyóniņi wurínírixini.

Wigi xiagwowami uriņipi nánirini.

²⁵ Xiagwoyíne, Kiraiso xegí siyikí imóniņiyí náni diņi sipí niwiri arirá winía náni xe yoxáipámi onipikípoiņiri eņipa oxoyíne eni segí apixíwami diņi sipí wírixini. ²⁶ O e nerína xegí siyikí imóniņiyí pípi imóniwiniginiri maríái, “Diņi wikwíroņwini.” rána igiá eámoņipimi dáni ikwiránániņi oimónipoyiniri eņirini. ²⁷ Xíoyá siyikí imóniņiyí xegí símimaņimini niņwirárinirína imiriņi mimóniņagi owiniminiri e eņirini. Rapirapí midunipa eri kikwiņwí meakínipa eri eņiyí yapi imóniņagi owiniminiri eri siyikwí mínipa eri xwiyiá meárinipaxí mimónipa eri eņagi siņwí owiniminiri eri e eņirini. ²⁸ Ayináni oxoyíne woxini woxini jiwaniņoxi diņi sipí niniri pírániņi menariņipa segí apixíwami eni diņi sipí niwiro pírániņi umérixini. Meániđipimi dáni wará ná bini imóniņagi náni áamá xiepiimi diņi sipí niwirína xío eni nawíni diņi sipí inariņi eņagi náni rariņini. ²⁹⁻³⁰ Nene niđírini. Xegí warápimi áamá go peá

mónariñirini? Oweoi. Kiraiso xíoyá warárími dáni sikwí wé iniñyíniñí imóniñagwi nání xíoyá siyikí imóniñwaéne píráníñí neameariñípa áamá níní eni axípi aiwá niro píráníñí menaniri ero yariñíá eñagi nání rariñini. ³¹ Bikwíyo dání re niriniri eánini, “Ayináni oxo xaniyaú píni niwiárimí xegí apixí tñi níkumixiniríná sini xixegíni mimóní ná ayí ná biníniñí imónariñíirini.” ³² E niriniri eániñípi xwiýíá xwé yumí imóniñí bi nání eni rinini. “Kiraiso tñi áamá xíoyá siyikí imóniñíyí tñi nání rinini.” nimónariní. ³³ E neri aiwi oxoyíné woxini woxini sewaniñoyíné ñiñí sipí inariñíápa segí apixíwami eni ñiñí sipí axípi wíríxini. Apixíwayíné eni segí oxowa seariápi xixeni aría niwiro wéyo uméírixini.

Niaíwíyo uriñípi nánirini.

6 ¹ Niaíwíyíné, Ámináo tñi nawíni ikáriníñíyíné segí ápowami tñi inókíwami tñi xixeni nañí aría wíríxini. E nerónáyí, ayí xixeni imóniñípi yariñagía nání rariñini. ² Ñwí ikaxí wé wúkaú Gorixo nira nuríná re riñíyí “Seyíné xixeni nixídirínáyí, nañípi seaímeaníirini.” riñíyí xámi riñípi, ayí ripirini, “Segí ápowami tñi inókíwami tñi wé íkwiañwíyo ñwiráírixini. ³ Xwíá tño ñweañáná nañí imóniñípi seaímeari xwiogwí obaxí seamúrori enía nání ayo wé íkwiañwíyo ñwiráírixini.” riñípi apirini.

Xanowami uriñípi nánirini.

⁴ Xanoyíné, niaíwíyí wikí óñipaxí imóniñípi nání uyínií mimé Áminá Jisasomi xídarigíyí epaxí imóniñípi wiewisiri xío riñípi uréwapiyiri érixini.

Xináíwániñí nimóniro omiñí wiiariñíyáyo uriñí nánirini.

⁵ Xináíwayínéniñí nimóniro omiñí wiiariñíyíné, segí bosí xwíá tño ñweagíawami wáyí wiro eñí siririñwí wiro nero aría yímigí wíríxini. Kiraiso riñípi aría niwiro xídarigíápa bosowami yapí miwíwapiyí píráníñí yómiñí nimóniro sekaxí searariñípi tñi xixeni érixini. ⁶ Wí bosowa weyí oneaméyoiniri wigí siñwí anigíe dánini nepániñí nimóniro yariñíápa mé seyíné Kiraisoyá xináíwayínéniñí nimóniro omiñí wiiariñíyíné eñagi nání Gorixo “E érixini.” wimónariñípi nero ayá tñi segí bosowami aría wíríxini. ⁷⁻⁸ Xináíwániñí nimóniro omiñí wiiariñíyíirani, omiñí wiipíri nání áxerwarí minigíyíirani, nñiyí pí pí nañí yariñíápi nání Ámináo píri numamoríná wigí yariñíápi tñi xixeni wiinía eñagi nání seyíné niñíirani. Ayináni segí bosowami searariñípi neróná “Áamá wí nánini miyariñwini. Negí Áminá Gorixo nání eni yariñwini.” niyaiwiro yayí tñi érixini.

Bosowami uriñípi nánirini.

⁹ Wigí Bosoyíné eni omiñí seaiariñíáwa yómiñí nimóniro seaíápa axípi e nero píráníñí uméírixini. Bosí seyíné seamieari ayo umieari eño

aŋínami ŋweaŋorini. Wí símí símí e nimeri yariŋíáyíniŋí mimóniŋorini. O e imóniŋo eŋagi náni seyíné níjía imóniŋoi. Ayináni segí omiŋí seaiariŋíáwami éf uremoariŋíápi píni wiárfírixini.

“Mixí náni ikínírixiniri neaiapiŋípi ikínírixini.” uriŋí nánirini.

¹⁰Yoparí oseariminiri imóniŋípi ripirini. Seyíné Ámináo tni ikárinigiá eŋagi náni eŋí sixí ínífírixini. “Eŋí sixí o xegí iníŋípimi dáni eŋí sixí ínífírixini.” searariŋini. ¹¹Seyíné obo xegí ináyíniŋí nimóniriŋípimi dáni yapí seaiepisiminiri yaríná xaíwí nimóniro xixe mixí wipaxí imónipíría náni Gorixo api tni níknímáná mixí owípoyiniri neaiapiŋípi nipini níkniri éríxini. ¹²Aga áamá tni mixí inariŋwá eŋagi náni misearariŋini. Pí pí kwíyí ría kiroariŋí aŋí piríyo yariŋípi —Api wí wíyo seáyi e niwimóniri umeariŋípirini. Wí néni tñí imóniŋípirini. Wí aŋína tni xwíárí tni ikwíróniŋími nimini síá yiniŋímini ŋweaariŋíáyo umeŋweariŋípirini. Api nipini tni nene mixí inariŋwá eŋagi náni rariŋini. ¹³Ayináni síá mixí xwiraimimí owikáraneyiniro seaipíría giyí giyí imónáná éf niwinimi mú xopírárí niwíera núfasáná sini eŋí neániri awí ropíría náni amipí Gorixo mixí náni ikínírixiniri neaiapiŋípi nipini ikínírixini. ¹⁴Ayináni ripi ripi néfasáná eŋí sixí níniri xaíwí éf róríxini. Xwiyía nepáni imóniŋípi arerixíniŋí yínífírixini. Siwí wé róniŋí imóniŋípi soría mixí náni éf noyíknínífa náni yínigiápiŋiŋí yínífírixini. ¹⁵Xwiyía yayí neainariŋípi —Api Kiraiso ámaéne neaiŋípimi dáni áamá xío tni ani imónipaxípirini. Xwiyía yayí neainariŋí api wáí urimeanero imónipírí náni áamá mixí inanero náni síkwí sú yínariŋíápa yínífírixini. ¹⁶Api nipini niyínimáná diŋí seyíné Kiraisomi wikwíroariŋíápi áamá níkníniŋí imanariŋíápaniŋí nimanimi úríxini. Níkníniŋí ana tni nimanimáná éf obo ría oniniri ría niyiniŋimáná ónapípi nipini supikípaxí eŋagi náni searariŋini. ¹⁷Yeáyí Gorixo seayimixemeanípi áamá mixí miŋí mineaохоpa oépoyniri arixí díkníariŋíápa díknírixini. Xwiyía Gorixoyápi, xíoyá kwíyípimi dáni seaíwapiyariŋípi kirá mixí náni xirariŋíápaniŋí xirírixini. E néfasáná eŋí sixí níniri xaíwí éf róríxini.

¹⁸Api api neríná anipá éríxiniŋí misearariŋini. “Gorixo arirá neaíwiniginiri íníná kwíyípimi dáni rixiŋí uriŋí wiro éríxini.” searariŋini. Ayináni seyíné maiwí bi mé siŋwí siŋwí tni nero pí pí seaímeápi xwámámí niwiro áamá Gorixoyá imóniŋí náni náni rixiŋí wuriyírixini. ¹⁹Nioni xwiyía yayí neainariŋí yumí imóniŋípi náni masisía minini áwaní urimíniri maŋí yámoaríná Gorixo anani woákíki wipaxoni nimixínífa náni eni rixiŋí nuriyírixini. ²⁰Xwiyía api yaŋí wurimeariŋíáoni eŋagi náni gwí ŋweaŋini. “Nioni ayá igigí mé e riimiginiri imóniŋípi tni xixeni urimía náni rixiŋí nuriyírixini.” searariŋini.

Tikikaso náni uriŋí nánirini.

²¹Tikikaso —O negí nírixímeá diŋí sixí uyiŋwáorini. Ámináo náni wáí nuriranéná diŋí uŋwiráripaxí yariŋorini. O niseaímearíná seyíné nioni pí

pí neri ηweaηápi náni nijáá imónipíri náni nipini náni áwaηí seariniηoi. ²²Ayí ripi náni uowárenapariηini. O niseaímeari áwaηí searána seyíne “Porowa e nimóniro ría ηweaηoi?” yaiwiro diηí wía seaóniri epíría náni uowárenapariηini.

²³Gí nixímeániηí imónigíáyíne, seyíne niwayiróniro ηwearo segi diηí niwikwíroriηípimi dáni xixe diηí sipí iniro epíría náni ápo Gorixo tíni Áminá Jisasi Kiraiso tíni awaú diηí seakikayóisixini. ²⁴Ámá negí Áminá Jisasi Kiraisomi diηí sixí nuyiríná ámi diηí peá nimori píni miwiárarigíáyo niyoni Gorixo wá wianíwinigini.